

Obrazovni projekat 11 evropskih regija "Edgate Interreg"

Osnivanje prvog evropskog regionalnog koledža

M. RENER

SARAJEVO - Izrada dokumentacije neophodne za osnivanje prvog evropskog regionalnog koledža jedan je od zadataka "Edgate Interrega", trogodišnjeg obrazovnog projekta 11 evropskih regija, koji bi trebalo da bude okončan do kraja 2007. godine.

Promovišući projekat, Severin Montina, pomoćnik ministra obrazovanja i nauke FBiH, istakao je juče da će nakon njegovog

okončanja evropske regije biti povezane i harmonizirane, te da će ekonomske i društvene razlike među njima biti smanjenje.

"Projekat je pokrenulo 13 obrazovnih institucija iz 11 evropskih zemalja, među kojima je šest u Evropskoj uniji. Suština je saradnja među regijama, u kojoj obrazovanje zauzima jedno od najvažnijih mjesta. Za tri godine poduzećemo niz malih, ali realnih projekata. Očekujem da ćemo pripremiti svu dokumentaciju za osnivanje evropskog

regionalnog koledža", kazao je Montina.

Objasnio je da je zamisao da evropske zemlje, učesnice projekta, budu "pokrivene" ovim koledžima, koji će biti bazirani na internacionalnom modelu, ali na način da model može biti primijenjen na regionalnoj razini.

"Biće izraden koncept, metoda implementacije, kurikulum i prijedlog finansiranja, te edukacioni materijali s naglaskom na mir i pripadnost Evropi. Takođe, kroz tri

godine definisaćemo probleme i potrebe regija i pronaći rješenja koja ćemo razmjenjivati i tako harmonizirati regije", rekao je Montina, dodavši da je jedan od zajedničkih problema nedovoljno poznavanje stranih jezika.

Ovaj projekat vrijedan je oko 1,5 miliona eura, od čega većinu finansira EU. Federacija BiH učestvovala sa 15.000 eura. U projektu ne učestvuje Ministarstvo prosvjete Republike Srpske.

